

JA' LI YOXIBAL SCARTA JUAN, JA' LI YAJTACBALAL LI JESUSE

¹Jo'on jchabivanejun yu'un li buch'utic yich'ojic ta muc' li Cajvaltique, chajc'opon batel ta carta, hermano Gayo. Ta melel c'uxot ta co'on yu'un co'ol jch'unojtic li sc'op Dios ti ja' melele.

²Jo'ot ti c'uxot ta co'one, ta jc'opon Dios ta atojol yo' naca lecuc scotol li c'ustic chapase, schi'uc ti ac'o lecuc oyot o jech chac c'u cha'al lec avo'on ta stojol li Diose.

³Ximuybaj o li c'alal jul yalbecun jayvo' quermanotic ti ja' yac chapas li c'usi yaloj li Diose. ⁴Mu c'usi yan ximuybaj o. Ja' no'ox ximuybaj o li c'alal chca'ibe sc'oplal ti ja' tspasic li c'usi yaloj Dios li buch'utic co'ol schi'uc quits'inab ta stojol li Cristoe.

⁵Jo'ot ti c'uxot ta co'one, lec chatun yu'un li Diose yu'un chacolta li buch'utic co'ol quich'ojtic ta muc' li Cajvaltique. Toj lec ti chavotes ta ana li buch'u nom talem ti mu xavojtaquine. ⁶Li jayvo' quermanotic li te i'ech'ic talem ta anae, jul yalbuncutic li c'u sba ac'uxubine. Ja' lec ti mi jech chapase, jech mu c'usi yan tsc'anic li c'alal chanavique. Lec ti mi jech chavich' ta muq'ue, ti chacolta ta sventa sbeique yu'un ja'

yajtuneltac li Diose. ⁷Yu'un ja' ta sventa yabtel Dios ti chanavique. Mu c'usi chc'anbatic la achi'iltac li co'ol jyanlumal crixchanooxuc yu'un mu xojtaquinic li Diose. ⁸Ja' lec jcoltatic li buch'utic jech ta x'abtejic yu'un li Diose, jech co'ol chij'abtejutic jchi'uctic. Ja' jech chpuc o li sc'op Dios ti ja' melele.

Ja' sc'oplal ti mu x'ac'van ta venta li Diótfefese

⁹La jts'ibabe xa scarta scotol li buch'utic yich'ojic ta muc' li Cajvaltique li te achi'uque. Pero mu xisch'unbe li Diótfefese yu'un ja' tsc'an chac comuc ta banquial avu'unic. ¹⁰Ta sventa ti jech tspase, mi libate, chcalbe ya'i ti chopol li c'usi chispasbuncutic, yu'un chopol chal je'oplalcutic. Pero ma'uc no'ox ti mu xijyich'cutic ta muq'ue, mu xotes ta sna nojtoc li yajtuneltac li Dios li te ch-ech'ique. Li buch'u tsc'an chotes ta snae tspajes. Li quermanotactic ti chotesic ta sna li yajtuneltac li Diose, li Diótfefese mu xa xac' x'ochic o ta ch'ulna.

¹¹Jo'ot ti c'uxot ta co'one, mu me ja'uc xachanbe li buch'u chopol li

c'ustic tspase. Ja' me xachanbe li buch'u lec c'ustic tspase. Scotol li buch'utic ti lec li c'ustic tspasique, ja' snich'nab Dios. Yan li buch'u chopol li c'ustic tspase, yu'un mu xojtaquin li Diose.

**Ja' sc'oplal ti ja' lequil
vinic li Demétrioe**

¹²Li Demétrioe scotolic chalic ta ja' lequil vinique yu'un lec li c'ustic tspase. Li jo'oncutique chcalcutic e'uc ti ja' lequil vinique. Xana'ic ti melel li c'usi chcalcutique.

Ja' sc'oplal ti chac ba sq'uel

¹³Oy to ep li c'ustic ta jc'an chacalbee, pero mu jc'an chajts'ibabe batel ta carta. ¹⁴Yu'un chac ba jq'uelot ta ora. Mi libate, chijlo'ilaj lec.

¹⁵Ac'o spas ta jun avo'on li Diose. Chabanucot la xalic li buch'utic co'ol quich'ojtic ta muc' li Cajvaltique li xayojtaquinique. Chabanuc xavalbe e'uc scotol li buch'utic xcojtaquinan li co'ol quich'ojtic ta muc' li Cajvaltique.